

06/09/1998

Teras minta penjelasan telus

KUALA LUMPUR: Teras Pengupayaan Melayu (Teras) meminta Perdana Menteri, Datuk Seri Dr Mahathir Mohamad memberi penjelasan yang telus kepada orang ramai berhubung tindakannya ke atas bekas Timbalan Perdana Menteri, Datuk Seri Anwar Ibrahim.

Pengerusinya, Mohd Azmi Abdul Hamid, berkata penjelasan Perdana Menteri itu penting untuk mengelakkan terus tersebarnya khabar angin ke seluruh negara.

Menurutnya, pihaknya berpendapat tindakan pemecatan Anwar bukan langkah biasa sebaliknya membuktikan wujudnya ketidakstabilan dan budaya politik yang kotor diamalkan.

"Teras berpendapat pemecatan Anwar sebelum melalui proses pengadilan adalah sangat pelik dan memberi gambaran masalah yang lebih besar sedang menguasai keadaan.

"Walaupun Perdana Menteri mempunyai hak istimewa untuk melantik atau memecat ahli Kabinet, penyalahgunaan kuasa sewenang-wenangnya akan menggugat keyakinan rakyat terhadap kewibawaan sesuatu keputusan.

"Apatah lagi, alasan yang diberikan terhadap pemecatan itu adalah sangat mengaibkan," katanya.

Selain itu, Azmi berkata, adalah menyedihkan ketidakstabilan dan permainan politik yang kotor itu berlaku dalam kepemimpinan Melayu.

(END)